


ALAHADY PANTEKÔTY – TAONA D 2022



« Rehefa tonga ny Fanahy fahamarinana, dia Izy no hitari-dalana anareo amin'ny marina rehetra » (Jo. 16: 13)

Ry Kristianina havana, mitodika any Andapa ny fo amam-panahintsika Olo Araiky Jiaby eto amin'ny diosezy satria mivory any ny Voatokana Jiaby eto amin'ny diosezy. Mivory any koa ireo solontenantsika jiaby miatrika ny famaranana ny sinaody iombonana eran-tany hanomezana ny fehin-kevitra hoentina any Tana sady hanomezana ny fitaovana entina miasa «INSTRUMENTUM LABORIS» amin'ny sinaody faha-7 dingana voalohany : Fianakaviana Eglizy kely miara-mivavaka, miara-mandalina ny finoana. Azo lazaina fa tena Pantekoty tokoa izay iainantsika any Andapa. Eglizy miara-dia miombona mandray an-tanana ka irahina ho misionera tahaka tamin'ny Pantekoty voalohany. Manantena àry isika EOV mba hivelona io Pantekoty Vaovao hanaovantsika eo amin'ny diosezy «nouveau départ» io tokoa.

50 andro lasa izay no nankalazantsika ny Paka izay fandalovana amin'ny ratsy miaraka amin'i Kristy. Miara-maty amin'i Kristy amin'ny ratsy dia ny fahotana isika ary indrindra na dia tsy mbola afaka aza ity "demony KORONTANAVIRUS" ity dia mba afaka nankalaza an-kalalahana isika ary indrindra matoky isika fa ho RESY izany satria tsy ny ratsy hoy isika no hanana faran-teny fa I Kristy, Alfa sy Omega, tsy miova omaly anio ary mandrakizay. Matoky tokoa isika fa mitsangana miaraka amin'i Kristy ka mandresy ny ratsy miditra amin'ny fiainam-baovao maha-zanak'Andriamanitra antsika. Fahariana vaovao irahina hanapotika ny rafi-pahotana fa hanorina rafi-pivelomanana mitondra amin'ny fanorenana ny TRANOBE IOMBONANA, NY FIANKAVIAM-BEN'ANDRIAMANITRA, FRATELLI

TUTTI, HO OLO ARAIKY ISIKA JIABY. Io ny tanjon'izao sinaody izao izay ankalazaantsika eto Andapa ny dingana voalohany handraisantsika ny "instrumentum laboris" izany hoe ny fitaovana entina miasa, fa eto koa no hamaranana ny anjarantsika amin'ny sinaody iombonana ka hovakina amintsika izay nataantsika aty amin'ny faritra avaratra. Matetika aho mivolagna amintsika tsy misy kisendrasendra. Andro Pantekoty no nahateraka ny Eglisy. Izao koa no hirosoantsika lalindalina kokoa amin'ny sinaody ataantsika ary eto koa ny Voatokana eto amin'ny diosezy manao fiofanana mba hirosoan'izy ireo lalindalina kokoa hivelomany ny vökasiony. Fanahy Masina no ANTOK'IZANY REHETRA IZANY. Manantena sy matoky àry isika fa hiasa tokoa ny FANAHY MASINA KA HO EGLIZY OLO VELOMIN'NY BATEMY, MIOMBONA, MANDRAY AN-TANANA KA ZARY MISIONERA HO TABERNAKLA VELONA.

Namakivaky ny 50 andro isika ka tonga amin'izao fankalazana ny Pantekôty izao. Pantekôty midika dimampolo andro taorian'ny nitsanganan'i Kristy tamin'ny maty ka nidinan'ny Fanahy Masina tamin'ireo Apôstôly izay natahotra ka nijanona tao amin'ny senakla. Niseho tamin'izy ireo matetika i Jesoa nankahery azy ireo ary indrindra fa nampanantena ny fiavian'ny Fanahy Masina. Fanahy mampiombona azy ireo amin'i Kristy ka hahatonga azy ireo ho Kristianina marina tokoa, ho Apôstôly hitory ny Vaovao Mahafaly. Tsy anivon'izy ireo intsony I Jesoa fa ny Fanahy no miombona amin'izy ireo, izany hoe izy ireo no tonga Kristy velona amin'izao fotoana izao ary izy ireo no Kristy mpiara-belona amin'olona. Kristy mpiara-belona amin'olona no mahatonga antsika ho génération mpanorina, génération de bâtisseurs, constructeurs fa tsy mpanapotika. Mpanorina Eglisy Tranon'Andriamanitra sy Eglisy Olona Velona isika ary izany ny Pantekôty. Ny fidinan'ny Fanahy Masina no mitondra amin'ny « nouveau départ vaovao » amin'ireo Apostoly. Azo lazaina fa tena « changement radical de comportement ». Satria ilay NAVOZO, natahotra, nanjary SAHY NIJORO HO VAVOLOMBELONA. Isika koa amin'izao vanim-potoana sarotra diavintsika izao, amin'izao sedra mafy atrehintsika izao dia maniry Pantekoty Vaovao koa-. Maniry ilay Afo nandoro ny ratsy rehetra tao amin'ireo Apostoly handoro koa ity KORONTANAVIRUS ity. Tsy afenina fa Pantekoty roa isika izao no ao anatin'ity KORONTANAVIRUS ity. Porofon'izany tsy afaka nanatanteraka ny fihaonany ireo Voatokana. Isaorana Andriamanitra fa misokatra isika amin'izao na dia mbola eo aza ity Korontanavirus ity. Mila mitandrina ihany. Tsy misy kisendrasendra hoy isika ka indro vory eto isika. Tena Pantekoty Vaovao tokoa. Tohizantsika ny vavaka totoafو miaraka amin'i Masina Maria satria tsy hamela antsika ilay Reny tahaka ny niarahany tamin'ireo Apostoly tao amin'ny senakla.

Fantatsika fa ankoatr'ilay Afo Mandoro ny Ratsy sy izay manimba dia ao koa ilay Afo Mampiombona nampiray ireo Apostoly ho FIANAKAVIAMBEN'ANDRIAMANITRA, ho FIANAKAVIAN-JANAHARY. Raha ny fitenintsika amin'izao dia nahatonga azy ireo HO OLO ARAIKY, HO FRATELLI TUTTI.

Maniry tokoa àry isika fa izao fankalazantsika ny Pantekoty izao hitondra antsika amin'ny Pantekôty Vaovao, hanampy antsika hiombona bebe kokoa ho Olo Araiky ka hanorina ny ETA sy EOV. Enga anie ho EOV MISIONERA VITA BATEMY KA IRAHINA ZARY TABERNAKLA VELONA.

Niara-nivavaka ireo apôstôly niandry ny nidinan'ny Fanahy Masina niaraka tamin'I Masina Maria sy tamin'ireo vehivavy masina tao amin'ny senakla. Henontsika amin'ny vakiteny voalohany fa ireo izay natahotra taloha dia feno ny Fanahy Masina, ilay Fanahy mpankahery, ilay Fanahy mpanazava, ilay Fanahy mpampiombona, ilay Fanahy mpampihavana. Nijoro nanambara izy ireo fa i Kristy no lâlam-pamonjena satria Izy no lâlana sy fahamarinana ary fiainana, ao Aminy sy miaraka Aminy ary amin'ny alalany no hahafahantsika manorina ny fiainana maha-zanak'Andriamanitra hahazoantsika ny hafaliana lavorary. Ny Fanahy Masina no mahatonga antsika hitoetra ao amin'I Kristy sy itoerany

ka hamokatra be sady ho feno hafaliana. Izany no ankalaizantsika amin'izao Pantekôty izao ry Kristianina Havana.

Fankalazana ny fahaterahan'ny Eglisy koa ny Pantekôty, ny Eglisy izay irahina hitory ny Vaovao mahafaly, hanompo ny vahoaka, hanasoa ny vahoaka, hanompo fa tsy ho tomponia ary hikatsaka mandrakariva ny hanasoa ny olombelona manontolo ka faly miarahaba antsika olo araiky jiaby amin'izao Alahady Pantekôty izao.

Ho dinihintsika ireo asan'ny Fanahy Masina eo amintsika izay hahatonga antsika ho kristianina EOV MISIONERA TABERNAKLA VELONA. Noho ny Fanahy Masina dia Olombaovao isika ka miova ireo fifandraisana telo mandrafitra ny mahaolona antsika dia tsy inona fa ny fifandraisana amin'ny zavaboary ka toy izay hanapotika dia ho "mpiambinina sy mapiro" isika mivelona ny vôkasiontsika hatramin'ny voalohany araka ny Bokin'ny Jenezy. Miverina amin'ny laoniny indray ny fifandraisantsika samy olombelona ka "mifampitsimbina sy mifanasoa sy mikatsaka ny soa iombonana" mandrafitra fiaraha-monina mitondra amin'ny maha-FRATELLI TUTTI antsika, amin'ny maha OLO ARAIKY ANTSIKA JIABY zary fianakaviamben'Andriamanitra isika. Tanteraka izany noho ny asan'ny Fanahy Masina zary Olo Araiky tokoa isika Jiaby ka mivondrona ho iray midera sy manome vonnahitra an'Andriamanitra Ray eo anivon'ny zava-boaary ka tanteraka ny fanirian'I Md Paoly "ny voaary manontolo dia samy miandry fatratra ilay andro hanehoan'Andriamanitra ny voninahitra natokany ho an'ny zanany rehetra" (Rm 8). Izany no mahatonga antsika milaza fa fahariana vaovao no entin'ny Pantekoty.

"Feno ny Fanahy Masina izy ireo ka nijoro ho vavolabelona" araky ny voalaza amin'ny vakiteny voalohany. Izany no asan'ny Fanahy masina manampy antsika tsy hatahotra intsony. Mila vavolabelona izao andro iainantsika izao, maro ny zavatra mikoroso fahana, ny zavatra ratsy aza matetika efa heverina fa mety daholo na ny lainga na ny fitapitaka, izay tsy manao an'izany dia heverina fa tsy normaly nefy izany dia mifanohitra amin'ny maha olona. Indrisy ity KORONTANAVIRUS ity vao mainka nampitombo ary nampikorosy fahana ny fiaianantsika zanak'Olombelona. Nampatoriana, hoy ny Papa ny finoana... traltry ny rendrarendran'izao tontolo izao. Koa raha manaiky handray ny Fanahy Masina isika dia ny Fanahy Masina hanampy antsika hiova araka ny voalazantsika "fiovam-penitra mahery vaika" tahaka ireo Apostoly. Ny asan'ny Fanahy Masina manampy antsika hiaina ny mahaolona antsika no hahatonga antsika ho Zanak'Andriamanitra.

Aoka hazava sao mifangaro amintsika fa ny Fanahy Masina tsy mitovy amin'izay voalazan'olona matetika ny fanahy no maha olona. Mihoatra noho izany ny Fanahy Masina. Ny fanahy mahaolona manambara fahendrena sy fahaizana miaina. Ny olona manam-panahy hoy ny Razana mampianatra izany fahendrena lalina izany dia lazaina ho olonkendry satria olona mahay manaja ny fifandraisana eo anivon'ny fiaraha-monina fa tsy manao saim-pantany fotsiny. Efa zava-dehibe izay fa ny Fanahy Masina kosa mahatonga anao ho olona feno tanteraka araky ny naharian'Andriamanitra antsika. Manavao antsika ny Fanahy Masina, tsy hoe mamelona ireo soatoavina fotsiny fa noho ny asan'ny Fanahy Masina dia olombaovao isika vokatry ny fitsanganan'i Kristy tamin'ny maty. Izany no antenaintsika vokatr'izao fankalazantsika ny Pantekôty izao mba ho vavolabelona isika eo amin'ny fiaianantsika andavanandro, ho EOV MISIONERA TOKOA.

Nijoro ho vavolombelona ireo Apôstôly ka nampianatra tamin'ny fiteny samihafa, tsy hoe mahay teny maro samihafa izy ireo fa noho ny asan'ny Fanahy Masina dia azon'ny olona tokoa ny nambarany ka nampiova ny fon'ireo nihaino azy ireo. Asan'ny Fanahy Masina ny mampiombona. Izany no niseho tamin'ny andron'ny Pantekôty voalohany. Koa enga anie raha mitory ny Vaovao mahafaly isika mba hahatakatra ny fon'ny olona faindrindra hanova ny fontsika voalohany indrindra sy ireo izay mihaino antsika koa tahaka an'ireo izay naheno ny fampianaran'ny apôstôly, hoy indrindra ny tenin'Andriamanitra tao amin'ny vakiteny voalohany : *"Nony tonga ny andro Pantekôty, dia tafavory tao amin'ny trano anankiray ny Apôstôly rehetra, ary tampoka injay nisy feo avy any an-danitra toy ny rivotra nifofofo mafy ka nahenika ny trano nitoerany: sady nisy lela maro mitarehina afo niseho taminy sy nizarazara nipetraka teo amboniny tsirairay avy, ka samy feno ny Fanahy Masina izy rehetra sy niteny tamin'ny fiteny maro samihafa, araka ny nampitenenan'ny Fanahy Masina azy avy."* Noho ny asan'ny Fanahy Masina dia niombona izy ireo, gaga ireo izay nihaino azy ireo satria naheno tamin'ny fitenin-drazany avy na dia Galileana aza izy ireo. Tsy hoe i Piera nahay ny tenin'izy ireo fa noho ny asan'ny Fanahy Masina dia nazava tamin'ireo mpihaino ny tenin'i Piera. Ny Fanahy Masina dia mampiteny amin'ny teny samihafa izany hoe mampiombona antsika. Io no nofinofy tamin'ny tilikambon'i Babela, ny hifankahazo resaka na fiteny, tanteraka izany raha avelantsika miasa ny Fanahy Masina. Maninona no tsy afaka mihaino ny hafa isika satria noho ny fitiavan-tena dia tsy misy intsony ny fihainoana ny hafa. Maro ny écouteurs hitantsika amin'izao fotoana iainantsika izao eny amin'ny sofintsika nefo tsy misy mi-écouter fa ny tenany, ny écouteur-ny no henoiny noho izany tsy misy mihaino isika, tsy mifampihaino isika. Rehefa tsy mifampihaino ny ao amin'ny tokantrano sy ny fianakaviana ary ny fiaraha-monina dia mikorontana ny fiainantsika. Avelao ny Fanahy Masina hiasa ao amintsika, dingana lehibe amin'ny fanorenana izany. Raha tiantsika ho taranaka mpanorina isika dia aoka hifampihaino, mihaino ny bitsiky ny Fanahy Masina, mihaino ny tenin'Andriamanitra ka manorina Eglisy Velona lo fahaizana mihaino io no dingana mitondra amin'ny fanorenana ny FRATELLI TUTTI, mitondra antsika amin'ny fanorenana ny maha OLO ARAIKY ANTSIKA JIABY. Raha mahay mifampihaino tokoa isika dia afaka mifampitsimbina sy mifanasoa.

Ny Fanahy Masina dia Fanahy mankahery antsika hiroso lalindalina kokoa eo amin'ny fiainantsika, manafaka ny alahelo hoy i Jesoa. Raha misy zavatra matatopatotra antsika dia entanin'ny Fanahy Masina isika hanana ireo fanomezana fito araka ny raisintsika rehefa mankalaza ny sakramentan'ny fankaherezana isika. Hanampy antsika hiatrika ny fiainana fa indrindra amin'izao vanim-potoana iatrehantsika krizy maro lafy izao. Tsy afenina fa mitady hiraviravy tanana isika satria tena mafy ny manjo. Marina tokoa izany ary mino aho fa ren'Andriamanitra izao hiaka ataontsika izao. Ny tena mampivonto ny fo dia ny visite pastorale hizarana ny sakramenta no tsy tanteraka efa roa taona nifanesy izay. Matoky an'Andriamanitra isika. Tsy avelany irery isika. Ny Fanahy Masina hanazava ny fiainantsika kokoa ka hitarika antsika amin'ny marina rehetra izay tsy IZA FA I KRISTY ILAY TSY MIOVA OMALY ANIO ARY MANDRAKIZAY.

Raha mandinika izany rehetra izany dia mahatsiaro fa tena rariny sy hitsiny ary mahavonyjy antsika tokoa izao sinaody izao na ny sinaody faha-7 eto amin'ny diosezy na ny sinaody iombonana erantany. Ny sinaody tokoa ny maha-Eglisy ny Eglisy vokatry ny Fanahy Masina. EGLIZY OLO VELOMIN'NY BATEMY MIOMBONA, MIARA-DALANA, MANDRAY AN-TANANA KA IRAHINA HO MISIONERA KA ZARY TABERNAKLA VELONA.

Aoka hazava ny resaka ataontsika fa indrindra andro fankalazana ny Pantekôty isika izao ka tsy anatin'ny fitapitaka na lainga na kobaka am-bava toy ny mahazatra antsika no ahafahantsika manorina fiombonana ary ahafahantsika mandresy ity fahavallo mandoza ity. Tsy anatin'ny kobaka am-bava no ahafahana manorina ny Tranobe lombonana fa tsy maintsy anatin'ny marina. Tsarovy araka ny averimberintsika matetika, tandremo sao diso ady atrehina isika ary tandremo sao diso tetik'ady ihany koa. Maniry firenena hisandratra mba hanana anjara masoandrony fa indrindra ao anatin'izao ady amin'ny fahavallo tsy hita maso izao dia fantaro araky ny averimberin'ny Eveka matetika fa tsy ny harena no tsy misy eto amintsika, manankarena i Madagasikara, tsy ny olomanga no tsy misy, manana olomanga fa mahantra olomarina ny firenentsika. Enga anie hanaiky ny Fanahy Masina hitari-dàlana antsika isika amin'izay hahafantatra ny marina araka ny hafatr'i Jesoa ao amin'ny Evanjely : « Rehefa tonga ny Fanahy fahamarinana, dia Izy no hitari-dalana anareo amin'ny marina rehetra ». Matokisa àry isika fa ny Fanahy Masina no hitondra antsika amin'ny marina fototra hanorenana ny EGLIZY FIANAKAVIAM-BE ZANAHARY, FRATELLI TUTTI, OLO ARAIKY ISIKA JIABY. Matokisa isika fa ny anjarantsika dia manokatra ny fontsika.

Ry Kristianina Havana, tsara ho tsakotsakointsika ny vokatry ny asan'ny Fanahy Masina. Ao amintsika tokoa ny Fanahy Masina ka nohavaoziny ny fontsika dia tsy inona fa ny fifankatiavana no miteraka hafaliana, hoy Md Paoly ao amin'ny vakiteny faharoa, fifaliana maharitra sy lavorary no mitondra fiadanana. Ny vokatry ny ratsy kosa dia manambara fa tsy mivelona ao anatin'ny Fanahy Masina isika, tsy inona fa ny fijangajangana, ny fahalotoana, ny fijejojejoana izay mifanohitra amin'ny fampianaran'i Jesoa ka mitarika antsika hanapotika ny fiaianantsika, ny fiaian'ny fiaraha-monintsika sy hanapotika ny tontolo iainantsika. Ny fanompoan-tsampy, ny fifandirana, ny fialonana, ny fahatezerana, ny ady isan-karazany ny fitsotokotokoana, ny famonoan'olona, ny fifamonoana dia asan'izao tontolo izao, ny fanahin'izao tontolo izao no mitarika antsika amin'ireny ary fantantsika ny vokany : fanapotehana, fanilikilihana ary famonoana. Ka raha taranaka mpanorina tokoa isika dia aoka handray ny Fanahy Masina, araka ny lazain'i Md Paoly : “ ireo izay manaraka ny hevitrizao tontolo izao dia tsy handova ny fanjakann'ny lanitra”.

Raha tiantsika ny handova ny fanjakan'ny lanitra sy ho mpanorina marina ary hanorina Eglisy Velona dia aoka handrehitra ao am-pontsika ny hafatr'i Md Paoly hoe ny vokatry ny Fanahy Masina no hahafantarana fa mifankatia isika ary feno hafaliana. Raha feno hafaliana maharitra isika dia fiadanam-po no ao amintsika, na dia eo aza ny zavatra sarotra dia manana faharetana isika amin'ny fifandraisantsika amin'ny tontolo manodidina antsika. Feno hazavam-po sy fahiratam-panahy isika, mikolokolo sy manatsara fa tsy manaratsy. Isika tsy mivadika amin'ny marina dia vokatry ny asan'ny Fanahy Masina, ny fahalalana onona, ireo no toetra ao amin'i Jesoa ka tsy maintsy ho toetrantsika. Mitaky fahafoizana izany ka aoka hifantsika amin'ny hazo fijaliana miaraka amin'i Kristy isika ka ny vokatry ny fankalazantsika ny Paka ho fiaianam-baovao ao amin'i Kristy.

Raha fintinina ireo rehetra ireo dia ity : FAHAFOIZANA, FANOMPOANA, FAHAMARINANA ireo no mitondra antsika hifampitsimbina, hifanasoa, hikatsaka ny soa iombona ka zary OLO ARAIKY ISIKA JIABY izany hoe FRATELLI TUTTI. Io no fiadanana andrandraintsika.

Ry Jesoa zokinay ô, misaotra anao izahay fa nomenao ny Fanahy Masina, nomenao ny Fanahinao izay manentana ny fiaianay andavanandro ka tsy izahay intsony no velona fa lanao no velona ato aminay ka zary vavolombelonao izahay, zary EOV MISIONERA TABERNAKLA VELOMA MANORINA ETA. Havaozy amin'ny Fanahinao isanandro izahay amin'izay dia hivondrona iray ho fianakavian-janahary, ho fianakaviana araiky aminao, ho taranaka mpanorina ny Eglisy velona, mpanàrina

firenena araka ny sitrakao ka tsy hatahotra izahay fa hiroso amin'ny lalindalina hatrany hampirehitra ao aminay ilay fitiavana mirehidrehitra tao amin'ny Apôstôly rehefa nidinan'ny Fanahy Masina izy ireo. Enga anie ny Afon'ny Fanahy Masina no hanentana anay jiaby amin'izao Sinaody izao ka ho tena EGLIZY MIARA-DIA IZAHAY MIARA-MANDRAY AN-TANANA MANORINA FRATELLI TUTTI , KA ZARY OLO ARAIKY IZAHAY JIABY. Io Fanahy Masina io no hahatonga anay ho tena vavolombelona tahaka an'i Olontsambatra Lucien Botovasoa sy Olontsambatra Victoire Rasoamanarivo. Mila vavolombelona ny andro iainanay ka aoka hirehidrehitra ao am-ponay tokoa ny fitiavanao mba ho mpanorina ny Eglisy Olona Velona. Masina Maria Reninay, Reny Mpiaro an'I Madagasikara fantatrao ny manjo anay, ary matoky izahay fa mitsimbina anay hatrany ianao, ka ho toy ny nataonao tany Kanà any Galilea, dia hotafaverina tsy ho ela eto afovoanay ny hafaliana ombam-piadanana. Md Josefa Ray Mpiaro ny Eglisy Erantany mivavahà mba ho maro ny Baba mahafoy sy manompo na eo anivon'ny fianakaviana « eglisy kely » na eo anivon'ny fiaraha-monina fa indrindra eto anivon'ny firenanay izay mandalo fotoan-tsarotra tokoa.

Amen

Mompera Arseveka Mgr Benjamin Ramaroson